

南宋古蹟考

光緒七年中冬之月

南宋古蹟攷

陳豪題眉

武林
丁氏
重雕

南宋古蹟攷卷上

錢塘 朱彭 輯

城郭攷

宋史高宗本紀建炎三年升杭州爲臨安府紹興八年定都心史云宋行在十三門咸淳志紹興二年霖雨城壞二十八年增築內城及東南之外城附于舊城凡十三門東曰便門候潮保安新門崇新東青艮山西曰錢湖清波豐豫錢唐南曰嘉會北曰餘杭水門五曰保安曰南水曰北水曰天宗曰餘杭元張翥蛻菴集有臨安故城圖詩

南宋古蹟攷卷上

一

外城門

便門 在東紹興二十八年增築又設西華東便二門游覽志候潮門在東而近南宋時有便門保安門今廢夢梁錄云沿寨向南有便門謂之東便門萬厯杭州府志候潮門外東爲期清坊舊便門街又云宋瓦舍有便門瓦

候潮門 在東方輿勝覽云紹興三十八年殿前都指使楊存中乞通展皇城十三丈以五丈作御路六丈作民居將來聖駕親郊由候潮門徑從所展御路直抵郊臺門外櫛木橋夫差廟諸跡錢唐遺

事高宗嘗宴大臣忽見張循王有玉孩兒扇墜上
識是墜十年前往四明誤墮于水屢尋不獲乃詢
張復遣根問云于候潮門外陳宅厨娘買得厨娘
因破黃花魚得之奏聞上大悅以爲失物復還之
兆

保安門 在東俗呼小堰門考通江橋本名慶元橋
北爲太醫局又東爲保安門

新門 在東俗呼草橋都城紀勝云城東新開門外
有富景園五柳園癸辛雜志云東都盛時無賴男
子以色圖衣食吳俗此風尤甚新門外乃其巢穴
皆傳粉盛妝飾善針指呼謂亦婦人其爲首者號
師巫行頭

南宋古蹟攷卷上

二

崇新門 在東俗稱薦橋門今名清泰當時門內有
崇新橋崇新巷皆以城得名夢梁錄云仲春十五
日爲花朝節崇新門外長明寺建佛涅槃勝會觀
者紛集竟日不絕葦杭紀談紹興中臨安府崇新
門鹿苑寺乃殿帥楊存中特建以處北地流寓僧
人一歲元宵側近營婦連夜入寺觀燈有殿司將
官妻同一女觀燈爲寺僧引入宿于幽室事覺毀
其寺西湖志餘宋時楊德温居崇新門外插枯竹

以引薜荔月餘枯竹復生未幾其妾溺水死明年竹園忽發兩岐扶疎可愛未幾其妹死乃知反常之物非吉兆也夷堅志云臨安薦橋門外米市橋之傍有賣琪豆者腰間生尾長四尺餘每用纏縛數匝乃得出常爲市中小兒窘迫必求觀乃止東青門 在東俗呼菜市門在菜市橋東今東青巷卽城之舊址也游覽志門之左宋有皇城司營武安泉水甚佳

指南錄序皋亭山距脩門三十里按脩門卽今艮山門也

南宋古蹟攷卷上

三

艮山門 在東今俗呼壩子門咸淳臨安志云走馬塘在艮山菜市門外平坦可馳馬故名舊有花柳號城東新路

錢湖門 在西今塞萬厓錢塘志云在清波門南內傍雲居山門北有海子口出城內諸山水西湖游覽志門之內有牙兵寨虎翼營教駿營騏驎營白鱧井夷堅志步司將狄訓練五更至錢湖門覺有物觸足取視則一巨蟹長三尺形模怪醜執送於家坐假寐夢一人綠袍軟幘持手板揖曰某乃西湖判官

清波門 在西門外有流福水橋咸淳四年建以引
湖水入城亦稱暗門故畫院劉松年居此人稱暗
門劉陸游夜泛西湖云騎馬出闇門指此周必大
二老堂雜志云壬午三日己亥晴與芮國器程泰
之蔣子禮出闇門上風篁嶺高翥春日湖上詩又
有清波門外放船時句泊宅編建炎己酉秋杭州
清波門裏竹園山平地湧血須臾成池腥聞數里
明年金人殺戮萬人卽暗門竹園山也

竹園山臨安志云在府治西南吳山一脈獨
趨而北隱隱隆起陰陽家以爲治所主山安

南宋古蹟攷卷上

四

撫趙與篤建閣其上平鑑西湖理宗御書竹
山閣後撫魏克愚徙其閣而山漸弛爲平地
陸游夜泛西湖示桑甥世昌 嗟我客上都忽已見
暮春騎馬出闇門眯眼吹紅塵西湖爲賈區山僧
多市人誰令污泉名只合加冠巾黃冠更可憎狀
與屠沽鄰齁齁酒肉氣吾輩何由親少頃一閒散
境寂鷗自馴舉手邀素月移舟來青萍鐘從南屏
來殷殷浮煙津鶴髮隱者歟長樂取釣緡畏冷不
竟夕恨此老病身明發復擾擾吾詩其絕麟
高翥春日湖上 清波門外放船時盡日輕寒戀客

衣花下笑聲人共語柳邊檣影燕初飛曉風不定
棠梨瘦夜雨相連薺麥肥最憶故山春更好夜來
先遣夢魂歸

僧揮寶月山作調寄訴衷情 清波門外擁輕衣楊
花相送飛西湖又還春晚水樹亂鶯啼 閉院宇
小簾幃晚初歸鐘聲已遠篆香纔點月到門時

字揮

殊仲

豐豫門 在西亦名湧金 宋名湧金紹興築城改
爲豐豫夢梁錄湧金池在豐豫門內考資治通鑑
建炎二年韓世忠敗苗翊勤王兵入北關苗傅劉

南宋古蹟攷卷上

五

正彥趨都堂取鐵券擁精兵二千夜開湧金門以
走蘇幼安秋堂墓志云淳佑八年柴秋堂望以上
丙丁龜鑑下獄趙京尹疏救之放歸田里設祖道
湧金門外者若鄭震吳陵葉元素朱繼芳等凡十
三人皆一時名流俞德鄰次韻趙提舉詩云湧金
門酒甜如蜜知當日湧金門酒亦甚著名乾道臨
安志政和六年郡守徐鑄以豐豫墮損命鈐轄楊
靖重建頗極壯麗榜曰湧金樓

施樞湧金門外 柳絲舞困起炊煙羅綺相催欲上
船貴冶亦知春有夜暖沙還付白鷗眠

貢性之湧金門外見柳 湧金門外柳垂金三日不
來成綠陰折取一枝入城去教人知道已春深
張孝祥鷓鴣天詞 日日青樓醉夢中不知樓外已
春濃杏花未溼疎疎雨楊柳初搖短短風 扶畫
鷁躍花驄湧金門外小樓東行行又入聲歌裏人
在珠簾第幾重

錢塘門 在西紹興二十八年增築杭城西四門曰
錢湖清波豐豫錢塘此錢塘名門之始宋史歐陽
守道以言罷徒出錢塘門惟書兩篋而已

王同祖湖上早行 錢塘門外買湖船霧氣衝雲水
接天只有蘇隄金線柳半籠斜日半籠煙

南宋古蹟攷卷上

六

嘉會門 在南通江路大街後代猶存嘉會弔橋游
覽志云馬倉巷北卽宋嘉會門按宋紹興增築城
外名南門曰嘉會時南門包絡宮門最爲長展西
際慈雲嶺東沿包山其門偏在包山之下夢梁錄
云嘉會城樓絢綵爲諸門冠蓋此門爲御道遇南
郊五輅從此幸郊臺

陸游四鼓出嘉會門赴南郊齋宮 客游梁益半吾
生不死還能見太平初喜夢魂歸帝所更驚老眼
看都城九重宮闕晨霜冷十里樓臺落月明自笑

蒼顏君勿笑少年慣聽舜韶聲

餘杭門 在北成化杭州府志杭人舊有十三門惟
餘杭門在北不得出居人之櫓亦名北關岳珂有
望北關門宋史苗傅傳苗翊馬柔吉以兵阻河韓
世忠率先鋒力戰後與光世乘之翊敗走勤王兵
入關

王銍繫舟餘杭門訪西湖金輪寺參上人 北郭望
西湖微徑幾尋尺淡與人意長寒雲正無色深尋
幽禪居步轉蒼山側落葉不可記遮盡山下石師
方無定居我亦何所適四海莽無歸老矣山中客
百年熟機緣還此共禪寂語罷古今分座上有陳
迹一笑視此生何事非戲劇開門納遙峰暮雨一
江白茲遊非世逢歸路晚蕭瑟積陰迷曉昏鐘聲
報將夕

南宋古蹟攷卷上

七

姜夔出北關 吳兒臨水宅四面見行舟蒲葉浸鶯
項楊枝蘸馬頭年年人去國夜夜月當樓傳語城
中客功名半是愁

葉紹翁出北關一里詩 脫衣命僕洗塵埃籬落人
家未見梅出得城門能幾步船頭便有白鷗來
張輯乙未之秋高郵朱史君錢唐北關舟中調寄祝

英臺近 客西湖聽夜雨更向別離處小小橋窗
香雪照樽俎斷腸一曲秋風行雲不語總寫入征
鴻無數 認眉嫵喚醒巖壑風流丹沙有奇趣羨
煞秦郎淮海漫千古要看自作新詞雙鴛飛舞趁
月底重修簫譜

保安水門 在東夢梁錄云保安水門河通跨浦橋
與江相隔游覽志茅山河入保安水門過保安橋
過軍橋折而北合流通江橋

南水門

北水門

南宋古蹟攷卷上

八

天宗水門 成化杭州府志舊又有天宗門俗呼爲
小北門余考水門卽在此地萬厯府志上堰在天
宗門外咸淳志南自天宗水門餘杭水門二河合
於北郭稅務前仁和縣志天宗棧庫在天宗水門
內

餘杭水門 都城紀勝云北關水門內有水數十里
曰白洋湖 考元時禁天下修城以示天下一統
內外城隍日爲居民所平至正十六年張士誠據
有浙西十九年發松江嘉興湖州杭州民夫復築
焉以舊城包山距河故南北長峙則自艮山門至

清泰門以東視舊則拓開三里而絡市河于內自候潮以西則縮入二里南截鳳山門子外故東西比舊差廣東無便門保安二門北增天宗北新二門仍十有三而南宋之城址已不無更易矣夢梁錄云諸門內便門東青艮山皆甕城水門俱平屋其餘旱門皆造樓閣諸城壁各高三丈餘橫闊丈餘禁約嚴切人不敢登二老堂雜志臨安土人諺云東門菜西門水南門柴北門米蓋東門絕無居民彌望菜圃西門則引水注城中以水舟散給坊市嚴州富州富陽之柴聚于江干由南山入蘇湖米則來自北關云

南宋古蹟攷卷上

九

內城門

南麗正門 咸淳臨安志云紹興二年九月南門成詔名曰行宮之門三年詔梁汝嘉創廊廡于南門之內鼠璞云行在南內門名麗正蓋取重離麗正之義夢梁錄云大內正門曰麗正其門有三皆金釘朱戶畫棟雕甍覆以銅瓦鐫鏤龍鳳飛驤之狀巍峩壯麗光耀溢目左右列百官侍班閣子登聞鼓院檢院相對悉皆紅杈子排列森然門禁嚴甚武林舊事冬至或元旦有事南郊自嘉會門至麗

正門計九里三百二十步皆潮沙填築其平如席
以便五輅往來肆赦日自文德殿詣麗正門御樓
夢梁錄云駕詣景靈宮有大旗名蓋天旗立於麗
正門外咸淳志云門外卽儀鸞司營考雲麓漫鈔
麗正門以鳳凰山作案山山盡處卽嘉會門則知
此門正對鳳山其址至今可意度也

北和寧門 在鳳凰山左游覽志般若寺卽和寧門
遺址夢梁錄云內後門名和寧在仁孝登平坊巷
之中亦列三門金碧輝映與麗正同把守衛士嚴
禁如人出入守闈人高唱頭帽號門外列百僚侍

南宋古蹟攷卷上

十

班閣子左右排紅杈子左設閣門右立百官待漏
院古杭夢游錄自大內和寧門新路南北寶玉珍
異及花果時新海鮮野味奇品悉集于此公主下
降日駙馬至和寧門易冕服又云院子小園子等
人祇直和寧門外紅杈子早市買賣市井最甚夷
堅志臨安內北門外西邊小巷民孫三者居之每
旦攜熟肉出常戒其妻曰照管貓兒一日忽曳索
出到門妻急抱回見者皆駭貓乾紅深色無不羨
歎浸達內侍之耳竟以錢三百千取之內侍欲調
馴安帖乃進已而色澤漸淡及半月全成白貓走

訪孫氏已徙居矣

楊萬里初夏清曉赴東宮講堂經和寧門外賞花市
詩 剩雨殘風一向顛花枝酒盞兩無緣忽逢野
老從湖上擔取名園到內前芍藥截留春去路鹿
蔥交上夏初天眾紅半霎聊經眼不枉皇州住二
年

東華門 夢梁錄入登平坊沿內城有內門曰東華
守禁尤嚴內城向南皆殿司中軍將卒立塞名中
軍聖下寨門外俱有護龍水池又云士人赴殿試
入東莘門各行搜檢方行放入武林舊事公主下

南宋古蹟攷卷上

十一

降先擇日宣召駙馬至東華門引見便殿及吉期
又至東華門用雁幣

考登平坊舊在清平山巷對清平山卽今高士坊
巷斜對六部橋宋六部二十四司卽在此地

西華門 據武林舊事增入咸淳臨安志紹興十八年名南門
南北東三門考咸淳臨安志紹興十八年名南門
麗正北曰和寧東苑門曰東華二十八年增築皇
城其城周迴九里玉海云紹興二年南門成名曰
行宮門十八年築皇城東南之外城五百四十一
丈更名西南門曰嘉會門文獻通考高宗詔百官

特許乘轎惟不入皇城

王同祖夜步內門詩 靜夜高燈人未眠等閒行過
內門前一聲唱徹連珠喏碧月朱欄綠柳邊

宮殿考

宋史地理志建炎三年閏八月高宗如臨安以州
治爲行宮揮塵餘話云車駕初至臨安霖雨不止
葉夢得言州治屋宇不多六宮居必隘窄上曰亦
不覺窄但卑溼耳然自過江百官六軍皆失所朕
何敢求安行在所錄紹興元年十一月詔守臣措
置修內司乞造三百間詔減二百余考藝祖宮中

南宋古蹟攷卷上

十二

止用赤白爲飾仁宗命欄楯撤去朱綠之采建炎
閒高宗至杭命內臣楊公弼徐康國勅行宮務使
簡約去華飭遵祖制也乾道臨安志云紹興七年
二月降詔巡幸建康府紹興八年三月移蹕臨安
下詔曰昔在光武之興雖定都于洛而車駕往返
見于前史者非一用能奮揚英威遍行天討上繼
隆漢朕甚慕之朕荷祖宗之休克紹大統夙夜危
懼不常厥居比者巡幸建康撫綏淮甸旣已申固
邊圉獎率六軍是故復還臨安內修政事繕治甲
兵以定基業非厭霜露之苦而圖宮室之安也故

茲詔諭想宜知悉按徐一夔行宮考云今以地度之南自勝果入路北則入城環至德侔天地牌坊東沿河西至山岡自平陸至山岡隨其上下以爲宮殿雲麓漫鈔政和五年東都築土山于景龍門之側以象餘杭之鳳凰山最高一峰賜名神運昭功封磐固侯亦名鳳凰山後神降有良嶽排空霄之語以在都城之良方故曰良嶽南山成易名壽嶽都人且曰萬歲山所謂餘杭鳳凰山卽今臨安府麗正門之正面案山山之盡處卽嘉會門山勢自西北來如龍翔鳳舞掀騰而下至鳳凰山止分

南宋古蹟攷卷上

十三

左右翼大內在山之左掖後有山包之第二包卽相府第三包卽太廟第四包卽執政府包盡處卽朝天門端誠殿在山之右掖後有山包之第二包卽郊壇第三包卽易安齋第四包卽馬院東南卽大江西爲西湖北爲平湖地險且壯實一都會其先兆于東都爲山之時

外朝正殿考

文德殿 紹興十二年建行在所錄謂之正衙六參官起居百官聽宣布于此宋史紹興十三年閏四月十七日冊貴妃吳氏爲皇后前期于文德殿內

設東西房東西閣夢梁錄元旦禁中景陽鐘罷百
官皆冠冕朝服諸州進奏吏各執方物之貢諸外
國正副賀正使隨班入賀上御正衙禁衛人高聲
嵩呼聲甚震爲繞殿雷百僚俱鞠躬聽宣制曰履
茲新慶與卿等同考行在所錄凡上壽則曰紫宸
殿朝賀則曰大慶殿宗祀則曰明堂殿策士則曰
集英殿四殿皆卽文德殿隨事揭名

楊萬里文德殿聽麻仍拜表 蒼龍觀闕啟槐宸白
玉堦除振鷺羣仗外諸峰獻松雪霜前一雁度宮
雲舍人就日宣麻制丞相瞻天進表文夙退自欣

南宋古蹟攷卷上

十四

還自笑素餐便當策殊勳

紫宸殿 上壽之所夢梁錄宰執親王百官過皇太
后殿上壽起居舞蹈嵩呼回詣紫宸殿宴程史端
慶節上壽紫宸殿百官皆賜食余侍班南廊老兵
持二髹牌至金書其上曰輒入御厨流三千里周
必大傳上始以內禪意諭二府二月辛酉朔降傳
位詔翌日上吉服御紫宸殿又考金國賀正旦使
人亦宴于此

魏了翁紫宸殿詩 珂繖搖心夢不成忽聽吏早放
衙聲吹燈撥火供晨粥趁到皇城卻六更 有次

鞭鞘陸續鳴赭袍當殿萬簪纓羣臣拜舞分行坐
十味肴饍酒五行 蹴踘尋幢列廣廷接絲吹竹
布前榮卿郎朶殿渾無見只聽時時萬歲聲 蛾
眉班捲戴花回遙望君王玉色開畫楯諸班謝茶
酒尻高首下一聲雷

劉燾金國賀正旦使人到闕紫宸殿宴 榆關玉塞
靜無塵嘉定于今第四春兩國交馳通好使八方
同作太平人翠鼉鼓奏娛佳客白獸尊浮賞諫臣
聖麻欲茲天共遠年年玉帛會楓宸

大慶殿 朝賀之所郊前三日百官奏請皇帝致齋

南宋古蹟攷卷上

十五

于大慶殿南渡典儀云淳熙十三年太上八十正
月元日再舉慶典其日文武百僚集大慶殿夢梁
錄云麗正門內正衙卽大慶殿遇明堂大禮正朔
大朝會俱御之又云元旦朝會駕坐大慶殿有介
冑長大武士四人立于殿陛之角謂之鎮殿將軍
殿西廡皆列法駕鹵簿儀仗龍墀立清涼繖十把
效太宗朝列諸國王班次如錢武肅孟蜀王等也
宋史乾道元年立皇太子十月十六日皇帝御大
慶殿行冊禮皇太子服遠遊冠朱明衣執桓圭前
期習儀

明堂殿 宗祀之所紹興四年八月壬寅知臨安府
梁汝嘉奏明堂行禮殿成九月辛酉祀明堂行宮
記作端誠殿

夢梁錄太廟在瑞石山紹興間建正殿十三
室十三室者太祖太宗真宗仁宗英宗神宗
哲宗徽宗欽宗高宗孝宗光宗寧宗各一室
也咸淳添置一室奉理廟神主通爲十四室
皆正中蓋終宋之世未有祧廟也前人未有
論及者攷中無太廟一條姑附于此

任希夷請御明堂齋殿 肇舉明禋預戒期請臨齋

南宋古蹟攷卷上

十六

殿御簾帷廊頭萬旅皆花帽殿下千官盡絳衣玉
輅時嚴三歲禮慶霄遙望五雲飛小臣頭白供籩
豆親見虞廷覽德輝

王廷珪明堂侍祠詩 唱徹嚴更鳳鑰開侍祠濟濟
列崇陔小臣亦忝廊西獻惟秉溫恭對越來 玉
佩珊珊出禁扉金蓮分炬散芳菲祠班咫尺臨黃
道惹得天香滿袖歸

集英殿 策士之所上御集英殿拆號唱進士名武
林舊事上御集英殿唱進士名狀元賜酒五盞餘
人各賜泡飯夢梁錄云四月初九日度宗生日平

章宰執親王南班百官入大內起居稱賀隨班從
駕過皇太后起居畢回集英殿賜宴又云士人殿
試前三日宣押知制誥詳定考試等官赴學士院
鎖院命御策題然後宣約赴殿士人詣集英殿起
居就殿廡賜坐引試依圖分廡坐定各賜印刊策
題

洪咨夔集英策士待宣于內軍器庫廊詩 漢廷興
目策英豪挽釣知誰首掣鼇百日紅連綸閣迥萬
年枝拂禁城高內廊坐永風生席輦路歸遲月映
袍西抹東塗渾忘卻一絢短雪不堪搔

南宋古蹟攷卷上

十七

劉燾瑞慶聖節集英殿宴 皇家卜世過周唐天啟
真人應運翔抱日預占恭邸夢飛龍曾報院山祥
翠雲影外來金母紅霧香中擁玉皇樂府賦工無
以祝願將金鑑代珠囊

垂拱殿 紹興十二年十一月庚子命內侍王晉錫
作崇政垂拱二殿時言者請復朔日觀朝之禮而
行宮止一殿故改作焉夢梁錄云垂拱殿常朝四
參起居之地聖節上坐垂拱殿上壽禮畢再坐紫
宸殿宋史淳祐五年二月十二日進孝宗光宗兩
朝御集寧宗實錄及理宗玉牒日厯其日皇帝御

垂拱殿提舉等官奉迎諸書至和寧門步導至垂拱殿各取合進呈書匣升殿陳隨應行宮記垂拱殿五門十二架長六丈廣八丈四尺簷屋三門長廣各丈五朵殿四兩廊各十二間殿門三間內龍墀折檻殿後擁舍七間爲延和殿按殿址在鳳凰山麓卽報國寺又按考古錄云南自苕帚灣北至柳翠橋皆報國寺界則垂拱殿址可想見矣

任希夷侍班二首 虎族分行鐵作搗殿前拜舞□
聲譁輔臣對罷無公事日照金鋪扇影斜 閭闔
新開露氣清舉鞭連騎入承明絲絢同傍班墀立

南宋古蹟攷卷上

十八

廣殿前瞻御榻橫

內朝後殿

崇政殿 卽祥曦殿淳熙六年與後殿同建陳隨應記云自北宮門循廊而左巨鐙幕次列如魚貫轉南爲神曦殿朵殿西接修廊爲後殿武林舊事后出宮至祥曦殿上升龍輦出和寧門至皇后家賜筵宋史崇政殿說書故左史兼紹興二年万俟卨羅汝楫並兼講讀綱目紹興七年閏二月以尹焞爲崇政殿說書乾道二年十一月幸教場從駕臣僚自祥曦殿並戎服起居元史世祖遣伯顏入臨

安宋主羸率文武百僚詣祥曦殿望闕上表乞爲
藩輔

魏了翁後殿侍立 須臾陞衛儼成行禁蹕聲聲輦
出房靴笏趨陪西府拜卻更絲履立東廂

考宋史新編曰杭城大內卽州治也休兵後始作
崇政垂拱二殿宮室志云垂拱崇政二殿雖曰大
殿其修廣僅如大郡之設廳淳熙再修止循其舊
宋史地理志云臨安宮室制度皆從簡省垂拱大
慶文德紫宸祥曦集英六殿隨事易名實一殿也
考臨安志垂拱祥曦係屬別殿當以親見爲不誣

南宋古蹟攷卷上

十九

延和殿 宋史宮室志淳熙八年秋改後殿擁舍爲
別殿取舊名謂之延和殿便坐視事則御之宋史
宗室子瀟傳孝宗嗣位志圖恢復子瀟練兵習爲
鶩鸛魚麗陣上觀于便殿嘉之時臣撰後殿上梁
文云聽朝決事兼汴都延和崇正之名論道談經
殆炎漢虎觀金華之比史云孝宗作敬天之圖開
延和之殿躬講讀之勤設補遺之官指此遇聖節
長至正旦寒食大禮齋或避正殿則御焉考垂拱
及後殿之後皆有此殿凡大禮齋宿於此亦稱東
齋殿西齋殿大禮後擇日詣景靈宮等處行恭謝

禮畢宣賜百官簪花于西齋殿七修類稿小仙林
寺卽後殿在山岡遊覽志亦云卽延和殿也以舊
紀殿址推之當在報國寺後
陸游延和殿退朝口號 雨餘未肯放朝暎穿仗恭
承聖主恩清蹕傳聲徐御殿紫衣引拜許龍門徠
徊漫結堯階戀零落難招楚澤魂歸去猶堪誇里
巷桐江新賜兩朱幡 十年短櫂樂滄波強著朝
衫棄釣蓑才薄何堪試鴻翊恩深猶許對延和空
牆煙柳遙迎馬輦路春泥欲濺鞞莫恨此身衰病
去同時朝士久無多

南宋古蹟攷卷上

二十

福寧殿 行在所錄云御寢也紹興閒禁中營祥曦
福寧等殿福寧殿側有清暑樓乾淳歲時記立春
前一日臨安府進大春牛設之福寧殿庭宋史留
正傳孝宗疾革正數請車駕過宮一日上拂衣起
正引裾泣諫隨至福寧殿正退上疏言極激切按
遊覽志尊勝寺卽福寧殿細考尊勝寺係芙蓉閣
址興元寺當爲福寧殿址舊志彼此互易宜從湖
山便覽改正

復古殿 燕閒之所宋史云本射殿也高宗建理宗
重修武林舊事云元夕燈火往往于復古膺福等

殿張掛又禁中避暑多御復古選德等殿周益公
讀三朝寶訓詩注云臣所得端硯刻復古殿三字
老學菴筆記紹興閒復古殿供御墨新安戴彥衡
所造自禁中降出雙角龍文

宋理宗題復古殿 列祖謀詒燕沖人命紹龜禁嚴
瞻復古締創想當時鳳紀因多歷翬飛欲寢隳端
居嘗念此涼德恐羞之勉輯炎興業新還禹舜規
棟驤飛玉瑱樸斲謹塗茨咫尺羹牆見延洪典則
貽緬懷光澤舊儼若煥章垂聖志惟先定鴻名寓
有爲風煙沈廟算天日俯疇咨屏翰環方召言謨

南宋古蹟攷卷上

二十一

富高夔權綱歸總覽制度永維持養士翔鴛鷺蒐
兵振虎貔宣王修政日光武中興時文治綏函夏
英威鬯遠夷萬方丕顯績三紀太平基繼述慙非
稱規恢動慨思肯堂心翼翼景行日孜孜載繹車
攻雅宜賡考室詩告成書梗槩拜手緝蕪辭

選德殿 夢梁錄射殿曰選德玉海曰孝宗皇帝闢
便殿于禁垣之東名曰選德續資治通鑑淳熙四
年九月閱蹴毬于選德殿又考玉海淳熙四年命
閣門稽太宗朝擊毬典故仍先習儀詔擊毬御棚
是日三少使相執政已下各分棚侍立上擊過毬

門回馬御殿皇太子以下稱賀六年十一月五日
選德殿出用人論示宰相俊卿等七年二月七日
御選德殿宣示立皇太子御札宰相允文再拜賀
宋史周必大傳孝宗一日詔同王之奇陳良輔對
選德殿袖出手詔命必大極陳當否後又被旨撰
選德殿記又玉堂雜記云必大爲禮部侍郎兼權
直學士院宣入選德殿御前小案用牙尺壓蠲紙
一幅傍有漆匣小歛硯置筆墨于玉格必大鞠躬
書除日行在所錄云御座後有大屏分畫諸道列
監司郡守爲兩行各標職位姓名又圖疆域于碑
屏中蓋紀實也

南宋古蹟攷卷上

二十二

陰楊太后宮詞云天下監司二千石姓名都在御
宋孝宗芙蓉觀擊毬賜宴選德殿 昊穹垂佑福羣
生滄德惟知監守成禾黍三登占叶氣簫韶九奏
播歡聲未央秋晚林塘靜太液波閒殿閣明嘉與
臣鄰同燕樂益修庶政答昇平

楊太后宮詞 用人論理見宸衷賞罰刑威合至公
天下監司二千石姓名都在御屏中 擊鞠由來
豈作嬉不忘鞍馬是神機牽韁絕尾施新巧背打
星毬一點飛

周必大入直召對選德殿賜茶而退 綠槐夾道集
昏鴉敕賜傳宣坐賜茶歸到玉堂清不寐月鉤初
上紫薇花

周必大選德殿記 皇上踐祚以來宮室苑囿一無
所增修獨闢便殿於禁垣之東名之曰選德規摹
樸壯爲陛一級中設漆屏書郡國守相名氏其上
羣臣有圖方略來上可采者輒棲之壁以備觀覽
數延見文武講論治道訪求民隱至于四方奏報
參軍國之機務皆于此省決暇則紬繹經傳或親
御弧矢雖大寒暑不廢臣俟罪禁林閒嘗奉詔獲

南宋古蹟攷卷上

二十三

至焉一日命臣汝爲之記臣愚學不足以推廣聖
意詞不足以鋪陳盛美謹但采禮詩古文以射觀
德事及歷代治亂興衰大端次第其說禮君世子
生三日射人以弧矢六射天地四方其早計若此
至于擇士以祭必于射也進退天下之才與祭者
繇是得爲諸侯卿大夫若屬有賓客之事燕勞之
寵莫不用射詩人又于其獻酬歌詠之餘中度不
中度罰爵與否有所戚休刺美以爲是王公大人
風化黎庶者之本也由此觀之古者君臣周旋禮
樂以服習勤苦可不謂先事知懼安而能危者哉

是故三代而上士大夫皆可獨將而兵民爲一戎
不生心世用底定比其季也徒以爲威儀觀美而
實不稱馳騁弋獵而政不舉則國人爲之隱憂而
變風作其後王道浸缺而文武兵農遂分而不可
合一夫荷戈海內騷動社稷之主以兵廢興蓋自
秦漢下迄五季數千百載間大抵亡具而漢之車
騎材官唐之府衛一二近古則享國最久其效可
睹矣以臣所按三代舊聞放乎漢唐文武離合之
際要之國家閒暇以戒懼爲本天錫陛下厲精百
王之後追蹤太古之上迺爲是殿以訪羣策以裁
萬務以閱圖史殿不主乎射也而託名焉射不專
于覲武也而尙德焉聖謨明遠于以覽示中外感
諷臣子敵國外患之慮甚深甚至昔宣王中興其
詩曰射夫旣同助我舉恣序之者曰是小雅盡廢
而復古之詩曰治有先後功在不舍沈潛剛克時
乃天道陛下堯舜揖遜而可以爲湯武臣敢以是
進

南宋古蹟攷卷上

二十四

緝熙殿 紹定五年十一月二十七日御製敬天地
法祖宗事親齊家而下凡四十條御札十二軸詔
講讀苑書官撰箴辭明年六月甲午緝熙殿成御

書緝熙二字榜之親爲記文以所製箴詞親洒宸翰列殿上以備觀覽 理宗闢舊講殿爲之御製記

熙明殿 卽修政殿度宗繼統改東宮益堂以爲講讀之所御製記雷溪詩選有題宋度宗熙明殿古墨詩徐一夔南宋行宮考度宗改東宮益堂爲殿而講筵延閣並在禁中

勤政殿 淳熙三年卽進食殿改建

嘉明殿 度宗卽東宮繹已堂改建夢梁錄云供進御膳卽嘉明殿在勤政殿之前對東廊門樓乃殿

南宋古蹟攷卷上

二十五

中省六尙局御厨祇應內侍人員俱集於此

膺福殿 元夕鼇山多于復古膺福明華等殿張掛明華殿

清燕殿 禁中重九于清燕殿賞橙橘乾涇起居注涇熙八年太上太后同至南內損齋進茶訖清燕殿看書畫玩器

慶瑞殿 卽順慶殿理宗改慶瑞禁中例于八日作重九排當于慶瑞殿分列黃菊燦然炫眼且點菊燈略如元夕

霽雲殿 大燕之所錢唐志鈔古宮室攷南內有霽

雲殿

澄碧殿 淳熙二年五月辛卯宴輔臣于澄碧殿玉
堂雜記淳熙四年史浩宴澄碧殿卽後苑澄碧水
堂詳園囿考

倚桂殿 周必大進呈選德殿賦于此卽倚桂閣詳
園囿考

睿思殿 陳隨應記云又東過閣子庫睿思殿程史
康與之在高皇朝以詩章應制與左璫狎適睿思
殿有徽祖御畫扇上時持玩流涕璫偶下值竊攜
至家而康適來留之燕飲漫出以示康給璫入取
肴核輒泚筆几間書一絕于上有頃璫出見之大
恐而康已醉無可奈何明日伺閒叩頭請死上大
怒亟取示之天威頓霽但一慟而已

符寶殿 貯躬應天命之寶

慈寧殿 紹興九年詔皇太后宮殿名慈寧三十日
畢功慈寧卽顯仁韋后也有羣臣請建皇太后宮
殿表載楓窗小牘卽慈寧宮明一統志云紹興九
年和議成太后有歸期高宗預作此宮于禁中宋
史作慈寧殿韋后十二年回鑾十九年正月朔卽
宮中行慶壽禮南渡以來慶典自此始十三年臧

保衡獻太后還慈寧宮頒特進一官

宋翔紹興樂章時韋太后歸慈寧宮 天意回皇母
歸戢烽燧敞宮闈朝陽赫奕明鞠衣惟皇之孝惟
母之慈陳仙仗薦壽卮從之冢后與庶妃奏之九
成與咸池沓珍瑞駢福祺山陬水裔咸熙熙惟天
之相與帝之宜千萬無窮期

康與之元宵慈寧殿被旨作調漢宮春 雲海沈沈
峭寒收建章雪殘鳩鵲華燈照夜萬井禁城行樂
春隨鬢影映參差柳絲梅萼丹禁杳鼇峰對聳三
山上通寥廓 春衫繡羅香薄步金蓮影下三千

南宋古蹟攷卷上

二十七

綽約水輪柱滿皓色冷侵樓閣霓裳帝樂奏昇平
天風吹落留鳳輦通宴賞莫放漏聲閒卻

節錄王仲信慈寧殿賦 恭惟皇帝之嗣位十六載
也海宇澄清四方底平受上天之眷命紹洪基于
休明邇安遠至措刑寢兵人熙熙兮春臺物蕩蕩
兮由庚六服承德眾心成城所以復炎德之輝而
迓周邦之衡先是駮駕從狩鄰國克享天心咸有
一德式遄來歸歡動九域乃命羣工擇基之隆儲
祥曦之勝圻建問安之上宮列辟肅然而赴職百
執蹌然而效忠爰卽行闕以成厥功于是上高擬

天下蟠法地削甘泉之繁縟屏舍元之侈麗揆太極之宸模就坤靈之寶勢乃諏龜筮龜筮協從乃稽萬物萬物無異帝曰欽哉乃彰鴻名慈以覆育于天下寧以鎮服于寰瀛蓋將昭徽音于大姒而表思齋于周京者也有嚴有憑或降或昇揆之以日築之登登經始勿亟百堵皆興於是匠氏經營百藝駢并礪焉而礪礪焉而礪高下曲折塗暨丹青四周凌天而岌業九門參空而伶俦闕百常兮屋十尋皆捷爵兮建瓴儻儻千栴閒閒族楹岫綺對砌窗霞翼櫺彤墀洋洋金碧煌煌神鴟展吻而

南宋古蹟攷卷上

二十八

景坐移羣玉之峰喜洩洩兮樂融融入如遇兮出
如逢映斗杓而瞳瞳挹天漢兮春容觀其巨鎮在
南長江在東前擁後顧盤錯窪隆占皇圖之奕奕
鬱佳氣之蔥蔥天海相際造化溟濛雕題貫膺大
編舸矇尋橦戴斗兮航浮索援背馳驅而致恭采
肅慎之楛矢職夷黔之布賚上則天目於潛之山
鳳凰南北之嶺巉巖截嶭窈窕回旋狀羣羽之集
麓若萬馬之奔川海門之潮滄溟之淵濠洶奔放
勢如朝焉皆足以小崦函而吞涇渭等河洛而隘
隴岍夫以此而駐蹕實一制而萬全然而不以爲
離宮不以爲別宇而轉以奉長樂之安而爲承顏
之所故能遠邁漢唐跨歷三五則雖兼天下之奉
極天下之貴亦人所樂而天所與也

穆清殿 見皇后冊禮東京延福宮舊有是殿

穠華殿 皇后所居

坤寧殿 武林舊事云坤寧穠華二殿皆皇后所居

眞德秀皇后閣端午帖子 記德當年夢月符浴蘭

節後卻旬餘欲知天錫無疆壽認取仙蜍頷下書

瑤池千丈藕花香清賞尤便水殿涼聞說內家

多樂事前皇親自捧霞觴

李易安端午帖子 意帖初宜夏金駒已過蠶至尊

千萬壽行見百斯男

事意帖用上官昭容見浩然齋雅談

陸升子皇后閣春帖子詩 內仗朝初退朝曦滿翠

屏硯池渾不凍端爲寫蘭亭

楊太后宮詞 泛索坤寧只一羊自從正位挫詞章

好生恭儉超千古風化宮嬪只淡妝

曾覲坤寧殿得旨次韻賦照水梅花調驀山溪詞

催花小雨輕把香塵灑簾捲水亭風梅影轉夕陽

西下靚妝窺鑑鴛鴦湛清漪浮暗麝翦芳瓊消得

連城價 玉樓十二寒怯珠衣掛曾是綠華仙眷

南宋古蹟攷卷上

三十

餘情新詞如畫花隨人聖須信世無雙騰鳳吹駐鸞輿堪與瑤池亞

受釐殿 欽聖向后所居天祿識餘宋錢忱伯之妻

瀛國唐夫人正肅公孫也紹興初隨其姑長公主

八謝欽聖向后于禁中先是戚里婦數人在焉俱

從后步過受釐殿同行者皆仰視讀釐爲離夫人

笑于旁曰受禧也蓋取宣室受釐之義耳后回顧

坐曰好人家男女終是別

慈明殿 楊太后所居三朝政要云紹定三年慈明

殿出緡錢犒軍德壽宮紀略紹定四年正月朔楊

太后年七十理宗行慶壽禮于慈明殿大赦陳隨
應記云便門通繹已堂重檐複屋昔楊后垂簾于
此曰慈明殿

慈元殿 謝太后所居宋史咸淳三年謝太后以兵
興費繁痛自裁抑汰慈元殿提舉以下官

仁明殿 全太后所居

清莘殿

重壽殿 紹興末以舊慈福爲重壽殿二太后皆徙
居此

萬春閣太后殿

南宋古蹟攷卷上

三十一

夫人閣

李易安夫人閣端午帖子 三官催解綬妝罷未天
明便面天題字歌頭御賜名

詩見浩然
雅談

奉華堂 劉婉容所居

宮

德壽宮 在望仙橋東高宗倦勤卽秦檜舊地築新
宮紹興三十二年六月丙子行內禪禮畢遂移仗
居焉都人稱爲北大內鑿大池續竹筧數里引湖
水注之其上疊石爲山象飛來峰有堂名冷泉樓
名聚遠又分四地爲四時游覽之所見周益公玉

堂雜記已詳載園囿攷資治通鑑云紹興三十一年太子卽位太上皇卽駕之德壽宮帝服袍履步出祥曦門冒雨掖輦以行及宮門勿止上皇麾謝再三且令左右扶掖以還顧羣臣曰託付得人吾無恨矣清波雜志引文士所作溫陽老人對云淳熙登號之二年朝太上皇于德壽宮奉玉卮上千萬歲壽肆大號加恩區內無論已仕未仕之父母第其年之如詔者而授之官乾淳記淳熙三年天中節高宗壽七十孝宗上尊號先十日諸公進香十二日皇后到宮進香排日太子妃及大內職典

南宋古蹟攷卷上

三十二

等進香至日卯時駕率皇后太子太子妃文武百官並詣宮上壽太上升殿皇帝起居拜舞如儀率皇后百官上酒作樂衛士山呼駕興入幄次少歇樂人再排立殿上降簾太上再坐太后率皇后太子妃上壽六宮次第起居禮畢退午刻恭請駕赴德壽殿排當皇帝以下簪花侍宴咸淳四年以其口改作道宮謝翱晞髮集有送袁太初歸剡序袁來杭宿傳法寺在德壽宮北今行路及園卽宮舊址

楊太后宮詞

瑞日瞳瞳散曉紅
乾元萬國佩丁東

紫宸北使班才退百辟同趨德壽宮

曹勛德壽宮春帖子 曉來簾幙捲東風尙有春寒
下綺櫳德滿人間和氣浹卯山宮殿瑞雲中 椒
房懿德慶源同環珮雍容冠六宮妝罷朝元無一
事關睢詩詠二南風

任希夷德壽宮卽事 金雀觚棱曉色開三朝喜氣
一時回聖人御口紅鸞扇天子龍輿萬騎來 霜
曉君王出問安寶香傳輦護朝寒五雲深處三宮
宴九奏聲中二聖觀 宴歸還駕七香車一夕天
開六出花瑞色先凝紫宸殿春光重到玉皇家

南宋古蹟攷卷上

三十三

萬年觴舉慶重華百辟口雲始拜嘉壽宴開時先
雪宴天花舞罷帶宮花

周必大從駕過德壽宮馬上得程泰之次庚寅玉堂
舊韻有銀章金帶之戲走筆爲謝 推敲也復重
鳴鑾鳳沼詩盟故未寒兩制空煩舍人樣外郎爭
比大夫官翰林今夜仍連直講殿明朝豈兩般畢
竟五金如五味莫回黃白議鹹酸

楊萬里德壽宮慶壽五首 長樂宮前望翠莘玉皇
來賀太后家青天白日仍飛雪錯認東風轉柳花
春色何須羯鼓催君王元日領春回牡丹芍藥

薔薇朵都向千官帽上開 雙金獅子四金龍噴
出香雲繞殿中太上垂衣今上拜百王仍有箇家
風 天父晨興未出房君王忍冷立風廊忽然鳴
蹕珠簾捲萬歲聲傳震八荒 甲戌壬春試集英
小臣曾是老門生蒼頭華髮班行事也聽鈞天九
奏聲 注云淳熙丙午元日聖上詣東朝慶壽八
秩積陰頓晴飛雪弄日聖孝昭格萬姓呼舞擬出
口號

慈福宮 淳熙十五年擬進皇太后吳宮名曰慈福
十六年正月十五日丙午皇太后遷慈福宮蘭亭

南宋古蹟攷卷上

三十四

博議吳皇后卽慈福太后親翰墨尤愛蘭亭作小
楷一本流傳內外

壽康宮 太上皇后曰壽康嘗產金芝十二莖于左
棟燦然榮茂夢梁錄壽康卽德壽殿太上所居後
生金芝改殿曰壽康宋史紹興五年改壽安曰壽
康慶元元年御書壽康之殿四字乾淳記淳熙三
年八月二十八日壽聖皇太后生辰二十一日卯
時皇后先到宮候駕至到太上前殿起居次至本
宮殿官裏第一班皇后第二班太子并妃第三班
各上壽訖太后宅親屬上壽並同天中節儀并賜

簪花酒至第五盞免大衣官裏便背兒赴坐第七盞小劉婉容進自製十色菊千秋歲曲破內人瓊瓊柔柔對舞上于閣子庫支賜五兩數珠色一號細色北緞十匹太后又賜七寶花十枝珠翠芙蓉綠領一幅又移座靈芝殿有木樨處進酒觀此知壽康殿亦名靈芝殿

慈壽宮 卽慈福宮以奉壽成皇太后咸淳志云孝宗受禪憲明皇太后御改曰慈福壽成皇太后御改曰慈壽通鑑寧宗開禧二年春二月慈壽宮火太皇太后移居大內

南宋古蹟攷卷上

三十五

程秘戊子正旦賀慈壽宮二首 曙色浮丹拱春風暖禁街微瀾迷秀石纖草蔭新槐 鳳駕回天仗鴛班集露門須臾趨魏闕杲日正中暎

重華宮 卽德壽宮咸淳志孝宗受禪移御德壽改名重華西湖志餘曰孝宗退居重華有淨室終日宴坐惟書籍筆硯楮墨近侍奏高宗皇帝留下寶器圖畫陛下盍時取觀孝宗曰先帝中興功德甚大故享此朕豈敢比先帝鎖閉不開綱目光宗紹熙元年春正月朔帝朝壽皇于重華宮三年冬十一月日南至越六日始朝重華宮皇后繼至從容

竟日而還四年冬十一月朔朝重華宮宋史尤袤傳上以疾一再不省重華宮表上封事曰壽皇事高宗二十八年如一日今日宗社付陛下當思所以不負其託望勿憚一日之勤以解都人之惑後數日駕卽過重華

孝宗旣退居重華宮羣臣請以聖誕爲重明節有術者曰重華重明非佳名也其文皆二千日至甲寅而孝宗上升正合其數見萬厯杭州府志

壽康宮 光宗內禪以舊福寧爲壽康而進福寧殿

南宋古蹟攷卷上

三十六

御書宮殿名七字五日一朝宋史宮室志初丞相趙汝愚議以祕書省爲泰寧宮已而不果行以懿皇后外第爲之上皇不欲遷因以舊福寧殿爲壽康宮留正傳嘉皇卽位正復相定壽康宮南向從之綱目寧宗慶元五年秋帝率羣臣詣壽康宮上壽初見太上皇成禮而還明日羣臣以上壽禮成奉表稱賀

東宮 宋史地理志云在麗正門內孝宗莊文景獻光宗皆常居之據行在所錄孝宗初育宮中祇造書院于宮門日內資善堂迨爲太子越旬日卽受

禪莊文受冊以無典故可稽止建廳堂并諸官屬
從屋乾道七年光宗升儲始于麗正門內之東建
太子宫門淳熙二年創射圃爲游藝之所圃有榮
觀玉淵清賞等堂及鳳山樓度宗位青宮更爲增
廣有凝華殿彝齋新益堂繹已堂瞻棗堂繼統後
改新益爲熙明殿繹已爲嘉明殿 射圃等詳園
圃考

楊萬里謝東宮燕榮觀堂 春草池塘太液旁水晶
宮殿牡丹香慙非綺里攀鴻翼也待承華宴鳳莊
玉唾銀鉤看落筆繡袍金椀拜盈箱迎門兒女牽

南宋古蹟攷卷上

三十七

衣袖搜得隨侯與夜光

劉燭東宮 鶴駕通宵入問安龍墀清曉押朝班天
顏喜見重輪月春色先回萬歲山

曾丰賀皇太子生日 運轉黃河舊波澄少海清菊
籬浮喜色蘭殿沸歡聲岐嶷親王羨聰明左右驚
英姿涵玉鑑冊禮建金旌入省龍樓曉歸休鶴禁
晴講筵心會道賓苑禮通情誕日愉謠滿儲庭瑞
彩盈兩宮筵具渥六佾舞儀輕靜念孤蹤遠曾叨
四友榮尙稽陪角綺遙祝壽筵鏗

趙彥端壽皇太子 日月龍樓問寢時雞人未動漏

聲遲前星一點朝天帝只有清臺太史知 子晉
吹笙未是仙阿丕橫槩少全篇小吟青著梅梢句
一日東風四海傳 大安宮裏漆園椿子幹孫枝
葉葉新今日四株高下碧相承一樣八千春 光
堯初御六龍天上直維參大火躔天意分明昌宋
德誕辰三世總丁年 西湖志餘淳熙中孝宗及
皇太子朝上皇于德壽宮周益公詩云一丁扶大
德三合鞏皇基蓋高宗生于大觀丁亥孝宗生于
建炎丁未光宗生于紹興丁卯故也陰陽家以亥
卯未爲三合

南宋古蹟攷卷上

三十八

隆祐宮 建炎元年詔以元祐太后宮爲隆祐宮隆
祐本欽聖憲肅宮名

升暘宮 建炎元年名潛邸爲升暘宮

瑞聖宮 在石姥峰峰在皋亭黃鶴之北有珍珠塢
高宗避金兵入此塢月餘以劉正夫所建永報寺
爲瑞聖宮受羣臣朝故其外有午門橋事定復造
焉由金家堰入盤山麓而東至珍珠塢人指其所
經爲輦道路今訛爲神道路塢見仁和縣志

睿聖宮 苗傅傳叛欲立皇子乞太后宣諭后猶
不許傅等語益不遜帝遣入奏禪位是日帝幸顯

忠寺太后垂簾降赦號帝爲睿聖仁孝皇帝以顯
忠爲睿聖宮

南宋古蹟攷卷上終

南宋古蹟攷卷上

三十九